

# Carta xi tjun tjun catsingatju San Pedru

---

**1** Ngahan Pedru, apóstol tsëhë Jesucristu ne, tsingátju carta vihi xi cuma nuju ngayujun ni xi cavitsojo ngayun ngajan distritu Ponto, distritu Galacia, distritu Capadocia, distritu Asia, cojo distritu Bitinia, cahndé xi nechuntuhun. <sup>2</sup>Hisca hatsëë ne, Nina ne, cavejñangucacun me cavaxijin me ngayun, hacuaha Hasen rë me ne, caviyujuxin nuju, cojo sa xi cuinuhyun tsëhë Jesucristu hacuaha cuma tyjahi xahasen nuju ngatsë rë jni rë me. Nina ne, catitsixuva me cjuandaja cjuajeya xi cuma nuju ngayujun ni.

## Cuetahantacun ngu cjuahñu xatsë

<sup>3</sup>Nihña jyë nihña hnga me xi Nina Nahmi rë Nai naja Jesucristu cojo Hasen rë me. Jercu hmu camá rë Nina ngayaan, hane ngatsë rë xi Jesucristu cavuya me cjuahñu tsëhë ngajñi rë nima. Nina ne, casahmi me xi cavuya catsin ngayaan cojo sa xi cuetahan tacun ngu cjuahñu xatsë, <sup>4</sup>hacuaha cojo sa xi satë naja ngu cjuandaja rë Nina xi tsajin nixtin xi cuetsun, hatuxa tyjahi, hacuaha tsajin nixtin cjuëya. Hane yëjë ni cjuandaja vëhë ne, tetjo vëhë ngahnga xi

cuma nuju ngayujun ni. <sup>5</sup>Hane tsëhë xi ngayujun ne, mangutacun cojo Nina ne, vëhë xi me vëhë tisahmi me cuidadu ngayujun ni cojo ngahñu rë me, cojo sa xi cuechuntuhun cjuandaja xi cuaxëtje me ngayun. Hane cjuandaja vëhë ne, ha tjin ndaja rë Nina cojo sa xi tsingacun me hya xi cjuë nixtin xi nechantahan ngasunhndë.

<sup>6</sup>Tsëhë vëhë xi ngayujun ni ndama nuju, handasa hitsë sa nixtin ne, sahmi ngu jyë xi jemu cuatjun cjuañihi cuma. <sup>7</sup>Cuatjin meje rë xi chutaha nuju, cojo sa xi cumatsejenquixi xi ndaja mangutacun cojo Nina. Sacuaha oro xi ma vetsun ne, ma chutahachuva rë cojo ndihi. Hacuaha ni tjin ni nuju ngayun ne, meje rë xi chutaha chuva rë xi mangutacun cojo Nina. Hane xi cuatjin mangutacun cojo Nina ne, jercu sa vengui chjí rë xi cuma rë oro. Hane xi cuatjin ndaja mangutacun cojo Nina ne, Nina ne, sahmi jyë sahmi hnga me ngayun, jemu ndajyihí cjuandaja xi sua nuju me, hacuaha cjuaharcun nuju me nixtin hya xi cuya cumatsejen nga Jesucristu. <sup>8</sup>Ngayun ne, hmutacún Jesucristu handasa cahyuun me, hacuaha mangutacun cojo rë me

handasa hacuiin tinutsujun me. Vêhê xi jercu ndama rê xahasen nuju ne, xi hisca maji nújun mé xi má nuju cojo xahasen nuju.

<sup>9</sup>Ngajan xi Nina ne, cuaxêtje me ngayun, ngatsê rê xi jercu ndaja camangutacun cojo rê me.

<sup>10</sup>Profeta ne, jercu cavutahahya camahani me hacutjin xi Nina cuaxêtje me xuta. Hacuï me vêhê xi ha tjun sa cachja me tsêhê cjuandaja xi ngascan sua Nina ngayujun ni. <sup>11</sup>Jercu cavutaya profeta xi cuacun jan janihya hacuaha hacutjin cuechú nixtin xi cachja Hasen rê Cristu xi jiya cahntsua xahasen rê me, hya xi tjun sa casua me camachaya rê xuta tsêhê yêjê ni cjuañihi xi ngascan cuatju Cristu cuma cojo cjuandaja ndajiyi xi satê rê me ngascan.

<sup>12</sup>Nina ne, casua me camachaya rê profeta xi cuacun jan ta cjua xi cachja me ne, hacuiin tsêhê me ndaja ta tsujun ndaja. Hane cjua vêhê ne, hacui cjua xi cachja xuta xi casua me camachaya nuju cjuandajiyi xi chja tsêhê Jesucristu ngatsê rê xi Hasen rê Nina xi caningatjun rê tsêhê ngahnga ne, cuatjin casua rê me chuva rê xi cuichja me. Cjua vêhê ne, hisca ángel ne, jercu meje cuijnercu.

**Meje rê xi naxenxen yojo naja tsêhê cjuatsehen**

<sup>13</sup>Vêhê xi meje rê xi tjín chjine ngayujun ni, hacuaha catiyuju chihin cjuatacun nuju. Ndaja tetuhun tacún tsêhê cjuandaja xi sua nuju Nina nixtin hya xi cuya cumatsejen nga Jesucristu.

<sup>14</sup>Sacuaha quihndi xi ndaja vihndê

ne, xicatuun cahndê xi cuitexa nuju cjuatacun tsehen xi tjín nuju hatsêê, hya xi jñu cjuatacun nuju. <sup>15</sup>Cahndê rê vêhê ne, ngajñi rê yêjê xi nihñu ne, naxunxun yojo nuju tsêhê cjuatsehen cojo sa xi tsêhê Nina cuma ngayun, sacuahatjin Nina, me xi cavaxijinjñi nuju ne, tuxa jercu xín me tsêhê yêjê ni cjuatsehen. <sup>16</sup>Tsêhê xi xcun xujun rê Nina ne, cuitjin camahindu cjua xi cachja Nina: “Meje rê xi naxunxun yojo nuju tsêhê cjuatsehen cojo sa xi tsahan cuma ngayun ta, ngahan ne, tuxa jercu xín ngahan tsêhê yêjê ni cjuatsehen.”

<sup>17</sup>Ngayujun ni ne, tsêhê xi “Nahmi” nújun tsêhê me xi texta ni tsichuva cjuatacun rê xingu xingu tucu xcusun xi sahmi me ne, vêhê xi meje rê xi ndaja chjuhunrcun Nina nguyêjê rê xi nechuntuhun nguehe ngasunhndê vi. <sup>18</sup>Ha hyun xi Nina ne, cavaxêtje nuju me tsêhê ndiya xi hacuiin machjirêhê, ndiya xi caviyuju nuju xutachanga nuju. Hacuaha hyun xi hacuiin ngatsê rê ngu xcusun xi cuma cuetsun sacuaha plata cojo oro xi cuatjin casahmi Nina ta <sup>19</sup>ngatsê rê jni rê Cristu xi cavanga xi jercu machjirêhê, sacuahatjin machjirêhê jni rê cjuaveya rê ngu chu hnditsánga xi tsajin camahani mé má rê chu. <sup>20</sup>Cristu jan ne, casuaxa Nina me hisca chaja sa xi cuejña ngasunhndê, peru quihndê xi tijima chuva nixtin xi nechantahan ngasunhndê vi ne, casua Nina xi catimachaya naja tsêhê me cojo sa xi ndaja cuatjun. <sup>21</sup>Ngatsê rê me vêhê ne, ngayun ne, camangutacun cojo Nina, me xi catsicuya Cristu

cjuahñu tsëhë ngajñi rë yëjë nima hacuaha casahmi jyë casahmi hnga me Cristu. Vëhë xi mangutacun cojo Nina hacuaha vetuhun tacun me.

<sup>22</sup>Ngayujun ni ne, xi tivinuhyun cjuaquixi rë Nina ne, cuatjin canitsiuhun xahasen nuju cojo cjuatacun nuju, cojo sa xi nihmutacún cojo nguñaja ni cjuandaja yëjë sa me xi ladu rë Jesucristu. Ngajan xi meje rë xi hñu nihmutacún xingun cojo nguñaja xahasen nuju. <sup>23</sup>Ngayujun ni ne, hacuaha cavuya catsin nga ngayun, peru hacuain tsëhë xuta xi hatuxa hme ta tsëhë ngu tjë xi cueyaain ta cjuarë Nina, cjuarë xi sua naja cjuahñu hacuaha tsajin nixtin cjuëya. <sup>24</sup>Xujun rë Nina ne, cuitjin chja:

Yëjë ni xuta ne, sacuaha xca nguijña me,  
yëjë ni xi ndaja tsëhë me ne,  
sacuaha naxu rë xca jan.

Xca nguijña jan ne, xí ne, naxu ne, vixu,

<sup>25</sup>peru cjuarë Nai naja ne, tsajin nixtin xi cjuëya.

Hane cjuarë vëhë ne, hacui cjuandajiyi xi casacu camachaya nuju.

**2** Vëhë xi ngayujun ni ne, meje rë xi tiyujunxun yëjë ni cjuatsehen, yëjë ni cjuandacha, yëjë xcusun xi sahmi xuta xi jo xcun jo hntsua tjin rë me, yëjë ni cjuaxin, yëjë ni cjuachjataha. <sup>2</sup>Sacuatjin rë ngu quihndinda xi meje rë suvá lechi ne, cuatjin catamameje nuju cjuarë Nina, cojo sa xi nguyëjë rë xi tivisehen nuju cjuarë jan ne, tuxaha sa cjuatacun nuju hisca xi

cuetjuntjun. <sup>3</sup>Cuatjin nihñu, sa xi ha camachaya nuju xi Nai naja ne, jercu ndaja me.

**Sacuaha ngu ndyojo xi jercu vengui chjí rë ne, cuitjin rë Jesucristu**

<sup>4</sup>Nihñutiñu tsëhë me ta me vëhë ne, quicun me. Me vëhë ne, sacuaha ngu ndyojo xi handasa catsitjungui xuta ne, peru xi cuma rë Nina ne, hatuxa catuxijin rë hacuaha jercu vengui chjí rë. <sup>5</sup>Hacuaha ngayujun ni ne, sacuaha ndyojo xi quicun ne, tuhun cahndé xi cjuaha nuju Nina, cojo sa xi cuma ngayun sacuaha ngu yungun hiscan xi nechunxun, hane satëxa nuju nihñu xa rë Nina sacuaha nahmi, xi tuhun cjuandaja nuju xcun Nina. Hane yëjë ni cjuandaja vëhë ne, chuya rë Nina ngatsë rë Jesucristu. <sup>6</sup>Xcun xujun rë Nina ne, cuitjin camahindu cjuarë xi cachja Nina:

Ngahan vejñávasen ngu xihin ngajan ndetjún Sión,  
hane xihin jan ne, sacuaha ngu ndyojo xi jercu vengui chjí rë, xi hacuaha catuxijin rë xi cuma titjun tsëhë xihndënaña;

hane xuta xi cumangucacun cojo xihin jan ne, tsajin nu tsajin nixtin xi cuetju sava me.

<sup>7</sup>Hane xi cuma nuju ngayujun ni xi mangutacun cojo Jesucristu jan ne, jercu vengui chjí rë me. Peru xi cuma rë xuta xi manguaaincacun me ne, cuetjucaa cjuarë xi camahindu xcun xujun rë Nina xi cuitjin chja:

Me xi catsitjungui xuta sacuaha tsitjungui chjinevexo ngu ndyojo xi chuyiin rë me tsëhë ne,

me vëhë ne, camatitjun me tsajan ngayejen ni.

Cuatjin camahindu. <sup>8</sup>Hacuaha cuetjucaa cju vihi:

Xihin jan ne, sacuaha ngu ndyojo xi xtenguiya rë xuta, ngu ndyojo xi sahmi xi tsichaja me ndiya rë me.

Cuatjin chja cju. Xuta xi manguaaincacun me ne, xtenguiya rë me, tsëhë xi vihndiin me cjuandajyihi xi chja tsëhë Jesucristu. Hatuxa cuatjin cavejña Nina xi cuatjin cuatju me cuma.

#### **Xuta xi tsëhë Nina me**

<sup>9</sup>Ngayujun ni ne, ngu tjë xi cavaxijin Nina ngayun, sacuaha nahmi xi fahacuenda yëjë ni xi tsëhë Nina ngayun, xuta xi hatuxa siuxin rë Nina ngayun, hacuaha xuta xi hatuxa tsëhë Nina ngayun. Cuatjin cun ngayujun ni, cojo sa xi ninguitsujun cjuandajyihi xi chja tsëhë yëjë ni cjuandaja xi casahmi Nina, me xi cajindaya nuju xi cavetjunixun tsëhë ngajñi jñu, xi cuisuhun ngajñi hasen ndajyihi rë me. <sup>10</sup>Hatsëë ne, hisca hacuiin xuta rë Nina ngayun, peru quihndë ne, xuta rë Nina camá ngayun. Hatsëë ne, hisca tsajin camayuma rë Nina ngayun, peru quihndë ne, camayuma rë me ngayun.

#### **Meje rë xi cuinechan ndiya rë Nina**

<sup>11</sup>Ngayujun ni xi sacuaha xuta ngu nangui xi nechunyun ndiya nguehe ngasunhndë vihi ne, vinchangë nuju xi nechunyun tsëhë yëjë ni cjuatsehen xi fehya rë xahasen naja, tsëhë xi sacuaha ngayaan xi vixcaan cojo xingueen

ne, cuatjin rë yëjë ni cjuatsehen vëhë cojo hasen naja. <sup>12</sup>Ndaja nihñu ngajñi rë xuta xi hvíin me Nina, cojo sa xi me xi cuacun vë ne, handasa choho cuichja me tsujun quihndë sacuaha xi ngayun xuta tsehen má yun ne, peru scuëë me yëjë ni cjuandaja xi tinihñu, sehe sahmi jyë sahmi hnga me Nina nixtin hya xi cjuahataha Nina jyë rë xingu xingu me.

<sup>13</sup>Ngatsë rë Nai naja ne, tinuhyun tsëhë yëjë ni xutaxa rë ngasunhndë vihi, há xi me xi matitjun camahani, <sup>14</sup>há xi xuta xi tsingatju me xi sahmi castigu rë xuta xi choho sahmi hacuaha cuaxëndaja me xuta xi ndaja sahmi. <sup>15</sup>Cuatjin nihñu ta, tsëhë xi Nina ne, meje rë me xi cjuandaja xi ngayun nihñu ne, sahmi xi xuta xi hvíin ne, cumaji choho cuichja me tsujun. <sup>16</sup>Tángun cojo ngasunhndë nuju sacuaha xuta xi tsajin camahani mé xi tjin tsavi xi cuma rë me, peru hacuiin ngatsë rë vëhë xi nihñu ngu xcusun cjuatsehen ta, xi meje rë ne, tángun cojo ngasunhndë nuju sacuaha xi mosu hndixahan rë Nina má ngayujun ni. <sup>17</sup>Chjuhuncun ni yëjë xuta. Nihmu tacún yëjë ni xi hacuaha ladu rë Jesucristu me, meje rë xi rcún Nina, hacuaha chjuhuncun me xi matitjun camahani.

#### **Cjuahmu xi cavatju Jesucristu camá**

<sup>18</sup>Ngayujun ni mosu hndixahan ne, tinuhyun tsëhë nai nuju, hacuaha chjuhuncun me, hacuiin suvá me xi xuta ndaja cojo me xi jeya ta cojo me xi hngacacun. <sup>19</sup>Cuatjin nihñu ta jercu chuya rë

Nina sacuatjin rë ngu me xi caa rë cojo ngu cjuañihi ngatsë rë xi vihndë me tsëhë Nina, handasa tsajin jyë rë me xi cuatjin vatju me má. <sup>20</sup>Sa xi ngayun choho nihñu hane má yun castigu ne, ¿yo ndaja cuichja tsujun xi scaa nuju castigu jan? Peru sa xi ngayun ndaja nihñu hane má ngayun castigu ne, jercu chuya rë Nina sa xi ngayun scaa nuju. <sup>21</sup>Nina ne, cajindaya me ngayun xi cuatjin cuatjun cuma. Cristu ne, cavatju me cjuañihi camá ngatsë nuju, hane cuatjin cavejña me ntsacu, cojo sa xi ngayun nihñu sacuatjin casahmi me. <sup>22</sup>Me vëhë ne, hisca ngu cjuatsehen casahmii me, hacuaha hisca ngu cjuandacha ne, cavetjiin cachja me. <sup>23</sup>Hya xi xuta choho cachja cojo rë me ne, me vëhë ne, hacuiin choho catsicuya me tsëhë xuta jan. Hya xi cavatju me cjuañihi ne, hacuiin cavincharcun me xuta jan ta cavetahacacun me Nina, me xi tsichuva rë xuta cojo cjuatacun rë me cojo cjuaquixi. <sup>24</sup>Suvá Cristu jan ne, cavaha me yëjë cjuatsehen naja ngajñi yojo rë me, ngajan xcun cru, cojo sa xi cuma cuetjunxen tsëhë cjuatsehen, hane cuma cuangentjenguen ndiya rë cjuaquixi. Ngayun ne, cavetjuntjun ngatsë rë cjuahmu xi me vëhë cavatju me camá. <sup>25</sup>Titjun ne, sacuaha chu tsánga xi cachaja tjin nuju ngayun, peru quihndë ne, cavuyun nga ladu rë Cristu, me xi fahacuenda nuju sacuaha ngu xuta xi fahacuenda rë chu tsánga, cuatjin sahmi nuju me cuidadu.

Cuitjin xi meje rë xi cuiyuju xuta cojo chjuun cojo xihin me ndava me

**3** Quihndë ne, ngayujun ni yachjin ne, tinuhyun tsëhë xihin nuju xingu xingu ngayun, cojo sa xi yahnga me xi vihndiin me tsëhë cjuarë Nina ne, cuijnecacun me, xi scuëë me xcusun nuju, handasa tsajin mé xi nújun, <sup>2</sup>cuenda xi scuëë me xcusun ndaja xcusun jeya nuju. <sup>3</sup>Mijí rë xi jercu nihñuxun cojo yëjë ni ngu xcusun xi sahmi ndacun nuju cojo yojo nuju sacuatjin hya xi vatjutaha nihñu ndacun tsjarcun, hacuaha cojo hya xi nihñuxun cojo adorno tsëhë oro, hacuaha cojo hya xi chujun ngu tsjian hnga chjí rë. <sup>4</sup>Cahndé rë vëhë ne, meje rë xi nihñuxun cojo yëjë ni ngu xcusun xi hincha cahntsua xahasen nuju sacuatjin hya xi ningacun cjuajeya xi cun yun ta yëjë cjuandaja vëhë ne, jercu vengui chjí rë xcun Nina. <sup>5</sup>Hatsëë ne, cuatjin casahmi yachjin xi siuxin me xi cuma rë Nina, yachjin xi cavetaha cacun me Nina. Me xi cuacun jan ne, cavihndë me tsëhë xihin rë me. <sup>6</sup>Nima Sara ne, cuatjin cahndë me tsëhë xutachanga naja Abraham, xihin rë me, hane “nai naha” cachja me tsëhë me. Hane ngayujun ni ne, quihndi rë me ngayun, sa xi nihñu yëjë ni cjuandaja hacuaha tsajin mé xi rcún.

<sup>7</sup>Cuanitjin ni nuju ngayujun ni xihin, xi nechun tangun cojo chjuun nuju xingu xingu yun ne, meje rë xi hyun xi hitsë ni chúva ngahñu rë yachjin. Chjuhuncun me ta, me xi cuacun vë ne, hacuaha chjuhunnstun tangun

cojo rë me cjuahñu xatsë xi sua nuju  
Nina cojo cjuandaja rë me. Cuatjin  
nihñu ngayun ne, cojo sa xi tsajin mé  
sahmíndya rë oración xi nihñu.

**Hya xi vatjun cjuañihi ngatsë  
rë nihña cjuandaja**

<sup>8</sup>Quihndë xi tsingufjnetaha cuichjá  
cojo nuju ne, ngayujun ni ne, meje  
rë xi tjin tangun cjuatacun nuju  
cojo xingun, meje rë xi tjin tangun  
xahasen nuju cojo xingun, meje  
rë xi nihmutacún xingun xingu  
xingu ngayun sacuaaha xi ngu naa  
ngu nahmi nuju ngayujun ni. Meje  
rë xi tjin nuju cjuayumatacun,  
hacuaha meje rë xi jeya ngayun  
cojo cjuatacun nuju. <sup>9</sup>Hacuaha  
cuéyanangë nuju xi mijí rë xi choho  
nihñu cojo yo xi choho sahmi  
cojo nuju, hacuaha sa xi yo choho  
cuichja cojo nuju ne, mijí rë xi choho  
chjayunngun tsëhë ta xi meje rë ne,  
ninchacuntuhun rë. Cuatjin meje  
rë xi nihñu ta, Nina ne, cajindaya  
me ngayujun ni xi chjuhunntsun  
ngu cjuaninchacuntihin. <sup>10</sup>Tjin ngu  
cahndé xcun xujun rë Nina xi chja  
cuitjin:

Me xi meje rë xi ndaja cjue cojo  
ngasunhndë rë hacuaha meje  
rë xi ndaja cuatju cuma ne,  
mijí rë xi choho cuichja me  
hacuaha mijí rë xi cuichja me  
cjuandacha;

<sup>11</sup>catetjuxin me tsëhë ndiya rë  
cjuatsehen, hane catisahmi  
me cjuandaja,  
catanguise me ndiya rë cjuajeya,  
hane vëhë catjicojo me.

<sup>12</sup>Cuatjin meje rë ta Nai naja ne,  
fahacuenda me xuta xi tsajin  
jyé rë,

hacuaha vihndë me oración xi  
sahmi xuta jan,  
peru Nai naja ne, chuyiin  
camahani rë me tsëhë xuta xi  
sahmi cjuatsehen.

Cuatjin chja xujun rë Nina.

<sup>13</sup>¿Yo choho sahmi cojo nuju sa  
xi ngayun hatuxa nihñu cjuandaja?

<sup>14</sup>Peru handasa cuatjun cjuañihi  
cuma ngatsë rë xi nihñu cjuandaja  
ne, tsimii sahmi rë ta ha tsujun  
ndaja. Hane xicarcuun hisca xi ngu,  
hacuaha hacuiin cumacjintacún.

<sup>15</sup>Meje rë xi chjuhunrcun Cristu  
cojo cjuatacun nuju ta me vëhë xi  
Nai nuju me. Hacuaha meje rë xi  
yëjë ni hora ne, tjin chjine ngayujun  
ni, cojo sa xi tuhun cjuaquixi nuju  
cojo tu yo ni xi cjuinenguise nuju  
mé má cuatjin vetuhun tacún Nina,

<sup>16</sup>peru tinújun cojo nguñaja ni  
cjuandaja cjuajeya. Tángun cojo  
ngasunhndë nuju cojo ngu xcusun  
xi ngascan ne, hisca hitsë tsajin  
cuma sava nuju, cojo sa xi xuta xi  
choho cuichja me tsëhë cjuandaja  
xi nihñu ngatsë rë xi tjin tangun  
cjuatacun nuju cojo Cristu ne,  
cuetju sava me tsëhë yëjë xi choho  
chja me tsujun. <sup>17</sup>Hitsë sa ndaja xi  
cuatjun cjuañihi ngatsë rë xi nihña  
ngu cjuandaja, sa xi cuatjin meje rë  
Nina, xi cuma rë xi cuatjun cjuañihi  
ngatsë rë xi nihña ngu cjuatsehen.

<sup>18</sup>Cristu ne, ngundiya ni cahme  
me ngatsë rë jyé naja. Me vëhë ne,  
tsajin xi cún rë me xcun Nina, peru  
cahme me ngatsë naja xi tjercu tjin  
jyé naja, cojo sa xi cuma cuiseen  
ladu rë Nina. Cristu ne, sacuaaha  
xihin xi má me ne, catsiquehen  
xuta me, peru sacuaaha hasen xi  
hacuaha má me ne, caticuya Nina

me cjuahñu. <sup>19</sup>Hane sacuahá hasen me jan ne, quiji cachja me ngu cjua cojo yějē ni hasen xi hinchahñu. <sup>20</sup>Hane hasen xi cuacun jan ne, hacui xi cahndiin tséhē Nina, hya xi tacunya tacunya Nina cojo jeya nguyējē rē xi Noé titsindaja me barcu rē me. Hane ngu jo me xi caxincha me cahntsua barcu jan ne, chuva rē jyin má me xi yějē me, cavetjutje me hya xi cavatju me xcun nandá. <sup>21</sup>Hane nandá jan ne, sacuahá nandá xi xtenda yaan xi vaxětje naja quihndē. Hya xi xtenda yaan ne, hacuiin xi tinityjahin yojo naja ta tichjahyan rē Nina ngu cjuatacun tyjahi, ngu cjuatacun ndaja, hane cuatjin vetjuntjen ngatsē rē xi Jesucristu ne, cavuya nga me cjuahñu. <sup>22</sup>Me vėhē ne, quiji me ngahnga, hane tacun me ladu quixi rē Nina. Quihndē ne, me vėhē vitexa me ángel cojo jingu sa xcusun hasen sa hasen ndaja sa hasen tsehen xi hacuahá matitjun ngajan ngahnga.

**Meje rē xi ningatahantacun sacuahá catsingatahacacun Jesucristu**

**4** Vėhē xi, sacuatjin Cristu cavatju me cjuañihi ngeuhe ngasunhndē vihi ne, cuanitjin ni ngayujun ni, meje rē xi taha catamangutacun cojo cjuañihi quihndē, tuxa má sa xi ngascan cuatjun cuma. Cuatjin meje rē ta, me xi ha cavatju cjuañihi camá ne, ha quihndē cuitexaain rē me cjuatsehen, <sup>2</sup>hane cjuenduju me cojo ngasunhndē rē me sacuatjin meje rē Nina, hacuiin sacuahá meje rē cjuatacun naja ngayaan xuta ngasunhndē. <sup>3</sup>Ha jercu canichujun

nixtin hatsėē, hya xi canihñu xcusun xi chuya rē xutaxín tséhē. Jercu choho ndiya cavinechunyun, jercu camameje nuju cjuatsehen, jercu camachuhun, jercu catsangun suhi hisca xi jercu si rcu xuta hacuahá jercu vatjutaha hvi me, hacuahá jercu cachjuhunrcun nina ndyojo, xcusun xi hatuxa ndajintjin. <sup>4</sup>Quihndē ne, xutaxín jan ne, fircun rē me hisca choho chja me, hya xi ngayun ne, matanguaain yun cojo rē me hya xi me vėhē findujú me cojo ndiya rē cjuatsehen xi hincha me. <sup>5</sup>Peru me vėhē ne, cuechú ngu nixtin xi sua me cuenta xcun me xi ha tjin chjine xi tsichuva me xuta xi quicun cojo xuta xi cahme cojo cjuatacun rē xingu xingu. <sup>6</sup>Vėhē xi hisca yějē nima ne, casacu camachaya rē tséhē cjuandajyihí xi chja tséhē Jesucristu, cojo sa xi, sacuahá hasen xi má jan ne, sacú rē cjuahñu sacuahá cjuahñu rē Nina. Cuatjin camá handasa, sacuahá xuta ngasunhndē xi má nima xi cuacun jan ne, ha cachjaháchuva rē xingu xingu cojo cjuatacun rē, sacuahá chjaháchuva rē yějē xuta ngasunhndē.

**Hacutjin meje rē xi cuisecoon xingueen cojo cjuandaja xi sua naja Nina**

<sup>7</sup>Quihndē ne, ha camatiña nixtin xi cjuē ngasunhndē. Vėhē xi meje rē xi ngayujun ni ne, tiyujun chihin cjuatacun nuju hacuahá tjin chjine ngayun, xi nihñu oración. <sup>8</sup>Hitsē meje sa rē xi nihmutacún xingun xingu xingu ngayun nguñajatacún ta, tséhē xi cjuahmutacun ne, vujnu rē jercu cjín jyé naja. <sup>9</sup>Hacuahá

chjuhunntsun xingun xingu xingu ngayun ndya nuju, xi hisca hitsë tsajin choho cuma tacún hya xi chjuhunntsun xingun. <sup>10</sup>Ngayun xi jercu cachjuhunntsun cjuandaja rë Nina hacuaha satëxa nuju xi ninguitsujun cjuandaja jan ne, meje rë xi xingu xingu ngayun ne, cuiseacun rë xuta xi yahnga, ha chuva rë xi casua nuju Nina ngu cjuandaja. <sup>11</sup>Yo ngayun xi cuinújun ne, tinújun sacuaha ngu xi chja cjua rë Nina. Hane yo ngayun xi cuiseacun xingun ne, tiseacun rë me cojo yëjë ni ngahñu xi sua nuju Nina. Cuatjin meje rë xi nihñu, cojo sa xi ngajñi rë tu mé ni cjuacjintacun ne, Nina ne, cuma jyë cuma hnga me cojo Hasen rë me ngatsë rë Jesucristu. Me vëhë ne, hatuxa jyë hnga me cojo Hasen rë me hacuaha jercu hñu me cojo cjuatacun rë me yëjë nu yëjë nixtin. Cuatjin jain.

**Cjuañihi xi cuatjun ngayaan  
xuta ladu rë Jesucristu**

<sup>12</sup>Ngayujun ni ne, mijí rë xi cjuercun nuju tsëhë cjuañihi jyë xi vatjun má xi chutahachuva nuju ta, tsëhë xi hacuiin hacui ngu xcusun xi cjuercun naja. <sup>13</sup>Cahndé xi cjuercun nuju ne, meje rë xi catamasua nuju táha hacutjin tivatjun cjuañihi tijima sacuaha cjuañihi xi cavatju Jesucristu camá. Cuatjin catamasua nuju, cojo sa xi hacuaha jercu cumasua nuju nixtin hya xi cumatsejen hacutjin jyë hnga Jesucristu cojo Hasen rë me. <sup>14</sup>Sa xi xuta choho chja me tsujun ngatsë rë xi tjin tangun cjuatacun nuju cojo Cristu ne, tsujun ndaja ta, vëhë

meje cuichja xi Hasen rë Nina xi jercu jyë hnga ne, tivëjña cojo nuju. (Xuta xi cuacun jan ne, hatuxa choho chja me tsëhë Jesucristu, peru ngayun ne, nihñu jyë nihñu hnga me.) <sup>15</sup>Sa xi yahnga ngayun cuatjun cjuañihi ne, mijí rë xi tsëhë xi caniquhun ngu xuta o sa tsëhë xi canihñu cjuachëjë o sa tsëhë xi tu mé sa ngu cjuatsehen o sa tsëhë xi visuhunjñu ngajñi rë cjuacjintacun rë xuta xi yahnga. <sup>16</sup>Peru sa xi yahnga ngayun cuatjun cjuañihi ngatsë rë xi ladu rë Cristu ngayun ne, mijí rë xi cumasava nuju ta meje rë xi nihñu jyë nihñu hnga Nina ngatsë rë vëhë.

<sup>17</sup>Ha cavechú nixtin xi cuetsihin tsichuva Nina xuta cojo cjuatacun rë xingu xingu me, hane cuetsihin me cojo naja ngayaan quihndi rë me. Hane sa xi tjun ngayaan tsichuva Nina ngayaan cojo cjuatacun naja ne, ðhacutjin cuatju me xi vihndiin tsëhë cjuandajiyi xi cachja Nina? <sup>18</sup>Hacuaha tjin ngu cahndé xcun xujun rë Nina xi cuitjin chja:

Sa xi xuta xi cafë jyë rë sehe tu ma vetjutje me ne,  
ðhacutjin cuatju me xi hisca  
cuendaain rë tsëhë Nina cojo  
me xi jercu sahmi cjuatsehen?  
Cuatjin chja xujun rë Nina. <sup>19</sup>Vëhë xi yëjë me xi vatju cjuañihi tsëhë xi cuatjin meje rë Nina ne, meje rë xi catjindujú me cojo cjuandaja xi sahmi me hacuaha catejña me yojo rë me tsja Nina, me xi catsindaja rë me ta, Nina ne, hatuxa sahmi chihin me yëjë cjua rë me.

**Cjua rë Pedru xi vinchangui  
me xuta ladu rë Jesucristu**

**5** Quihndë ne, meje cuichjá cojo nuju ngayujun ni xuta



changá xi vitexun ngajñi rè yějē xuta ladu rè Jesucristu. Ngahan ne, hacuaha xuta changá ngahan xi cavēē hacutjin cavatju Jesucristu cjuañihi camá. Hacuaha satē ná ngahan sacuatjin rè me xi cuacun jan cjuandaja xi cuetjucaa ngascan.

<sup>2</sup>Cuichjá cojo nuju xi hacuaha meje rè xi chjuhuncuendun xuta ladu rè Nina xi siuntsun, sacuaha ngu cha xi fahacuenda rè chu tsánga. Cuatjin nihñu nguñaja cjuasua sacuatjin meje rè Nina, hacuiin cjuachan hacuaha hacuiin ngatsē rè xi jercu meje nuju tujún. Chjuhuncuendun me nguñajatacún, <sup>3</sup>hacuiin sacuaha xi ngayun má yun nai tsēhē me ta meje rè xi tejñu ntsacu, cojo sa xi xuta ne, tjengui me ngayun cojo xcusun nuju. <sup>4</sup>Ngajan xi hya xi cuinduva nga me xi matitjun ne, ngayun ne, chjuhunntsun cjuandaja xi sua nuju Nina, cjuandaja xi tsajin nu tsajin nixtin cjuēya.

<sup>5</sup>Cuatjin ngayujun ni xihin xi hitsē ni chúva nu nuju ne, tinuhyun tsēhē xuta changá. Hane ngayujun ni ne, meje rè xi jeya ngayun cojo cjuatacun nuju hacuiin xta yun ngajñi nuju cojo xingun ta tjin ngu cahndé xcun xujun rè Nina xi cuitjin chja:

Nina ne, tsitjungui me xuta xi jercu tjin rè cjuaxta cahntsua xahasen rè,  
peru xuta xi jercu tjin rè cjuajeya cahntsua xahasen rè me ne, Nina ne, jercu sua rè me cjuandaja.

Cuatjin chja xcun xujun rè Nina.

<sup>6</sup>Vēhē xi ngayujun ni ne, meje rè xi ninguijnu yojo nuju xi cuinuhyun

tsēhē Nina, me xi jercu hñu cojo cjuatacun rè. Cuatjin nihñu cojo sa xi me vēhē ne, sahmi jyē sahmi hnga me yun, hya xi cuechú nixtin rè. <sup>7</sup>Tiyujunxun yějē ni cjuacjintacun nuju, tiyujun tsja Nina, tsēhē xi me vēhē ne, vutsejen me ngatsē nuju.

<sup>8</sup>Ngayujun ni ne, meje rè xi tjin chjine yun hacuaha nechun quicun ta, tsēhē xi Satanás ne, xitsehen xi maji vēē nuju ne, tsuyihi sacuaha ngu chu xa xi jercu titsichan chu, xi vangui chu yo xi sacú ru xi sinē chu. <sup>9</sup>Xicaningatuun rè, hane tiyujunhñu cjuatacun nuju xi mangutacún cojo Nina. Cuatjin nihñu ta ha hyun xi yějē sa me xi hacuaha cojo ladu rè Cristu hinchá jingujyē ni ngasunhndē ne, hatuxa tjin rè me xi cuatju me yějē ni cjuañihi vēhē cuma.

<sup>10</sup>Peru xi ha cavatjun cjuañihi hitsē nixtin ne, Nina ne, tsityjahi me cjuatacun nuju, cuiyujuchihin me cjuatacun nuju, cuiyujuhñu me xahasen nuju, hacuaha cuiyuju cahndé me cjuatacun nuju. Nina xi sahmi cuatjin jan ne, hacui me xi tjin rè yějē ni cjuandaja, hacui me xi cajindaya nuju me xi satē nuju cjuahasen ndajyihì rè me xi tsajin nu tsajin nixtin xi cjuēya, ngayujun ni xi tjin tangun cjuatacun nuju cojo Cristu. <sup>11</sup>Nina ne, hatuxa jemu hñu me cojo cjuatacun rè me yějē nu yějē nixtin. Cuatjin jain.

### Cjua xi vijnetaha

<sup>12</sup>Ngahan ne, catsihindu nuju ngu jo cjua vēhē, cojo sa xi cuinchangē nuju hacuaha tsinguixē nuju xi cjua vēhē ne, hacui cjuandaja jain rè

Nina. Tiyujunhñu cjuatacun nuju xi cuangunndujun cojo cjuandaja vëhë. Silvanu ne, me xi ndaja fitjengui rë ndiya rë Cristu ne, cavisecoo ná me xi catsihindu nuju.

<sup>13</sup>Xuta rë yungun nguehe Babilonia, xi hacuaha cavaxijin rë me Nina ne, tsingatju me nina nuju. Hacuaha Marcos xi sacuaha

quihndi naha ne, tsingatju cha nina nuju. <sup>14</sup>Tuhun rë xingun ngu nina, cojo cjuandaja cojo cjuahmutacun tindatsuhun xingun, sacuahatjin xcusun naja. Catisua nuju Nina cjuandaja cjuajeya ngayujun ni xi tjin tangun cjuatacun nuju cojo Cristu.